

**Nuup Sisimiut Ilulissat Qaqortullu avataatigut illoqarfiit mikinerit aningaasar-  
sionnikkut ineriartornissaat pillugu, kommunit suleqatigalugit,  
pilersaarusiortoqarnissaa suliareqqullugu Naalackersuisut peqquneqarnissaannik  
Inatsisartut aalajangiiffigisassaattut siunnersuut. Pilersaarussiaq kingusinnerpaamik  
UPA 2020-mi Inatsisartunut saqqummiunneqassaaq  
*Anders Olsenimit, Siumut, saqqummiunneqartoq***

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap sularinninnermini ilaasortarai:

Inatsisartunut ilaasortaq Karl Kristian Kruse, Siumut, siulittaasoq  
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia  
Inatsisartunut ilaasortaq Niels Thomsen, Demokraatit  
Inatsisartunut ilaasortaq Jess Svane, Siumut  
Inatsisartunut ilaasortaq Múte Bourup Egede, Inuit Ataqtigiit  
Inatsisartunut ilaasortaq Mala Høy Kuko, Siumut  
Inatsisartunut ilaasortaq Jens Napātôk', Partii Naleraq

UKA 2018-imi ulloq 30. oktober 2018 siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Nuup, Sisimiut, Ilulissat Qaqortullu saniatigut illoqarfiit mikinerit ineriartornissamut periarfissaasa qulaajarneqarnissaat erseqqissarneqarnissaallu siunnersuuteqarnermini siunnersuuteqartup kissaatigaa.

**Siunnersuutip Inatsisartunit siullermeerneqarnera**

Naalackersuisut partiillu amerlanerussuteqartut siunnersuut siullermeerinninnermi taperserpaat. Ilaatigut illoqarfinnik mikinernik ineriartortitsineq namminersortut suliniuteqarnerannik annertunerusumik aallaaveqartariaqartutut, taamaattumillu

ineriartortitsinermik aallussinermut taarsiullugu tamatumunnga killiliussassanik pisortat aalajangersaasariaqartut isumaqarlutik Demokraatit siunnersuut tapersersinnaangilaat.

### **Siunnersuutip aningaasaqarnikkut kingunerisassai**

Aalajangiiffigisassatut siunnersuutip piviusunnngortinneqarnerani aningaasatigut kingunerisassai siunnersuummut tunngavilersuutini allaaserineqassasut Inatsisartut suleriaasianni § 33, imm. 1-imi allassimavoq.

Siunnersuutip piviusunnngortinneqarnera AC-p ataatsip suliaqartinneqarneranik naleqartussatut siunnersuuteqartumit tagginneqarpoq. Tamatuma qularutiginissaanut ataatsimiititaliaq tunngavissaqarsorinngilaq. Killiliussat nassuiaatigineqartut iluanni allannguutissatut siunnersuut aamma suliarineqarsinnaassasoq ataatsimiititaliamit ilimagineqarpoq, minnerunngitsumik suliassap nuna tamakkerlugu pilersaarutip suliarineqarneranut Naalakkersuisunit ilanngunneqalersaarnera eqqarsaatigalugu.

### **Ataatsimiititaliap siunnersuummik suliarinninnera**

Naalakkersuisut akissutaannit una ataatsimiititaliamit immikkut maluginiarneqarpoq:

”Pingaaruteqarpoq siunnersuutip piviusunnngortinniarnernanut sulinermi kommunit Namminersorlutillu Oqartussat akornanni sulianik agguataarineq pillugu pisariaqannngitsumik nalornissuteqartitsilernissamik pilersitsinissaq. Sulianik agguataarineq eqqarsaatigalugu apeqqummut atatillugu inoqarfiit pillugit kommunini qinikkat pingaarnersiunerannut pilersaarutinillu aqutsinerannut nuna tamakkerlugu qinikkat akulerutinnginnissaat kommuninit assut pingaartinneqarpoq. Inoqarfiit ataasiakkaat ineriartornissamut ilimanaateqarfiinik nalilersuisussat qaninnerpaat tassaapput kommunit. Tamanna tunngavigalugu nunamut tamarmut aningaasaqarnikkullu aalajangersimasumik pilersaarusiortarput. Tamatuma suliassaqarfiit Namminersorlutik Oqartussanit ingerlanneqartut ingerlataasa assigisaannut ataqatigiissaarneqassasoq kissaatigaat, tamatumani minnerunngitsumik tunngaviusumik attaveqatigiinneq eqqarsaatigalugu.

Naalakkersuisut aalajangiiffigisassatut siunnersuut aallaavigalugu kommunit qanimut suleqatigalugit nunap immikkoortuini assigiinngitsuni piginnaasaqarfiit, ineriartortitsinissamut periarfissat aammalu nuna tamakkerlugu immikkoortumut pilersaarutit kommuninilu pilersaarusiorderup ataqatigiissarnerisigut suliassami ilimanaatillit qitiutillugit aallunnerisigut taama ineriartortitsinissamut pilersaarummik suliaqartoqarnissaa. Taassuma pilersaarusiorderup inernera nuna tamakkerlugu pilersaarusiordermut nassuiaammi immikkut sammisatut saqqummiunneqarnissaa naatsorsuutigineqarpoq, tamanna UPA 2020-mi pisinnaassaaq.”

Kommunit Namminersorlutillu Oqartussat akornanni sulianik agguataarineq pillugu Naalakkersuisunit saqqummiunneqartoq ataatsimiititaliamit isumaqatigineqarpoq.

Taamaalillunilu ataatsimiititaliap allassimasut tusaatissatut tiguai, tassungalu atatillugu ”immikkut sammisaq” taaneqartoq nuna tamakkerlugu pilersarusiornermut nassuiaammi siunissami aalajangersimasumik ilaatinneqartalissanersoq isumaliutigeqqullugu Naalakkersuisunut kaammattuutigalugu. Kiisalu aaqqissuussaannikkut aporfissaasinnaasut inuussutissarsiortut namminersortut ineriartornissamat periarfissaannut akornutaasinnaasut qulaajarnissaat nassuiaammi qitiutillugu sammineqassasoq ataatsimiititaliamit kaammattuutigineqassaaq, taamaaliornikkut aporfissat taamaattut annikillisinneqarsinnaaqullugit peerneqarsinnaaqullugilluunniit, ataatsimiititaliarmi tunngaviusumik isumaqarmat siuariartorneq namminersortut suliniuteqarnerannik aallaaveqartariaqartoq. Kiisalu aporfissat paasineqartut taamaattut iliuuseqarfigineqarnissaannut siunissami aningaasanik immikkoortitsinissaq ataatsimiititaliamit piareersimaffigineqarpoq.

Tamannalu tunngavigalugu allannguutissatut siunnersuut una ataatsimiititaliami amerlanerussuteqartunit Siumup Demkraatillu ilaasortaataannit saqqummiunneqarpoq:

**Aaqqissuussaannikkut aporfinnik nunatsinni illoqarfinni nunaqarfinnilu inuussutissarsiortut namminersortut ineriartortitsinissamat periarfissaannut akornutaasunik qulaajaalluni misissueqqissaarnermik ingerlatsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Kommunit soqutigisallilu susasaqartut allat misissueqqissaarnermi akuutinneqassapput misissueqqissaarnerullu inernerit Inatsisartut UPA 2020-mut atatillugu tunniunneqassapput.**

Ataatsimiititaliami ikinnerussuteqartut Inuit Ataqtigiit ilaasortaataat siunnersuut pillugu ima oqaaseqarumapput:

Inuit Ataqtigiit allannguutissatut taamak siunnersuuteqarpugut, nalunaarusiornikkut pilersarusiornikkullu nunatsinni illoqarfiit inoqarfiillu minnerit ineriartornissaat pisariaqartoq kinguarsarneqarsinnaammat. Aallartittoqartariaqarmat 50 mio. kr.-inik aningaasaliisoqarnissaa siunnersuutigaarput, ineriartorneq piffinni taaneqartuni toqqammavissilluarumallugu.

*Nunatsinni illoqarfiit inoqarfiillu mikinerit isorliunerusuniittullu aningaasarsiornikkut ineriartornissaat siunertartalugu Naalakkersuisut AI2020-miit 50 mio. kr.-inik aningaasaliinissaannut peqquneqarnissaannik Inatsisartut aalajangiiffigisassaattut siunnersuut. Ineriartortitsinissami kommunit qanimut aningaasalersuinissami pilersarusiornissamilu suleqatigineqassasuttaaq Naalakkersuisut kaammattorneqarput.*

Ataatsimiititaliami ikinnerussuteqartoq Partii Naleqqap ilaasortaataat siunnersuut pillugu ima oqaaseqarumavoq:

Taamatut siunnersuutigineqartoq ataatsimiititaliamit amerlanerussuteqartunit siunnersuuteqarfigineqarpoq imatut allannguutissatut siunnersuuteqarfigineqassasoq:

*Aaqqissuussaaniikkut aporfinnik nunatsinni illoqarfinni nunaqarfinnilu inuutissarsiortut namminersortut ineriartortitsinissamut periarfissaannut akornutaasunik qulaajaalluni misissueqqissaarnermik ingerlatsinissamik Naalakkersuisut peqquneqarnissaanik Inatsisartut aaliangiiffigisassattut siunnersuut. Kommunit soqutigisallillu susassaartut allat misissueqqissaarnermi akuutinneqassapput misissueqqissaarnerillu inernerit Inatsisartut UPA 2020-mut atatillugu tunniunneqassapput.*

Partii Naleqqamiit allannguutissasut siunnersuut peqataaffigisinnaanngilarput siullermeerinermit amerlanerussuteqartut suliaqarnerani ersarissaanerput toqqammavilersuutigalugtigu aporfiit kisimik misissuinnarnagut aammalu tamatut eqqarsaatigiinnarnagu isumaqaratta siunnersuutip qulequtaa ersarilluinnartoq allanngorterujussuartoqartussanngortoq uggornarluinnarutut Partii Naleqqamiit isigigatigu.

Partii Naleqqamiit siunnersuutip imarisaa tapersersorluinnaratigu oqaatigissavarput, tassalu Nuup Sisimiut Ilulissat Qaqortullu avataatigut illoqarfiit mikinerit aningaasarsiornikkut ineriartornissaat pillugu, kommunit suleqatigalugit, pilersaarusiortoqarnissaa suliareqqullugu Naalakkersuisut peqquneqarnissaanik siunnersuutaammat, taamatullu pilersaarut kingusinnerpaamik UPA 2020-mi Inatsisartuni saqqummiunneqassalluni, naqissuserlugu kingusinnerpaamik upernaakkut saqqummiissasut Naalakkersuisut pilersaarusiuteqassasut .

Partii Naleqqamiit isumaqarpugut pisariaqarluinnartoq qanoq iliuuseqartoqarnissaanik tassalu illoqarfiit mikinerit pineqartut aningaasarsiornikkut ineriartornissaat pillugu kommunit suleqatigalugit qanoq iliuuseqartuinnartariaqarluinnartoq. tamannalu suleqatigiinnikkut pilersaarusiorneqarlunilu qanoq iliuuseqarfigineqartariaqarluinnarmat ikinnerussuteqarluta oqaaseqaateqarpugut, qitiusumiit inersisaasoqanngilluinnaqqissaanera akuersaarinnaanngilluinnaqqissaaratigu

### **Ataatsimiititaliap inassuteqaatai**


**Ataatsimiititaliami amerlanerussuteqartut** Siumup Demokratillu ilaasortaatitaasa amerlanerussuteqartut allannguutissatut siunnersuutaat akuersissutigineqassasoq inassutigaa.


**Ataatsimiititaliami ikinnerussuteqartut** Inuit Ataqtigiit ilaasortaatitaasa **Inuit Ataqtigiit** allannguutissatut siunnersuutaat akuersissutigineqassasoq inassutigaa.

**Ataatsimiititaliami ikinnerussuteqartup** Partii Naleqqap ilaasortaatitaata siunnersuutaqqaartoq akuersissutigineqassasoq inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

  
Karl Kristian Kruse  
Siulittaasoq

  
Aqqaluq B. Egede  
Siulittaasup tullia

  
Jess Svane

  
Múte Bourup Egede

  
Niels Thomsen

  
Mala Høy Kuko

  
Jens Napátôk